

Ataatsimiinnerup ammarneqarnera

(Inatsisartut Siulittaasuut)

Inatsisartut Siulittaasuuttut Inatsisartut Naalakkersuisullu 2021-mi ukiakkut ataatsimiinnissamut matumunnga uummammit tikilluaquakka.

Takusinnaavara ilaasortat tamarmik ukiakkut ataatsimiinnissap matuma aallartinnissaanut tikissimasut, taamaalillunilu Inatsisartut tamakkiisumik aalajangiisinnaassuseqartut.

Kim Kielsen, Siumut, novembarip ulluisa 30-at ilanngullugu sulinngiffeqarpoq, Siumullu sinniisussamik ataatsimiigiqqusisoqarnissaanik qinnuteqarsimalluni. Kim Kielsenip sulinngiffeqarnerani Nikkulaat Jeremiassen sinniisussaatur ataatsimiigiqquneqarsimavoq.

Qinigaanerup Misilinneqarnissaanut Ataatsimiititaliap Nikkulaat Jeremiassen qinigaasinnaasutut akuersissutigaa. Akerliusoqarpa?

Nikkulaat Jeremiassen Inatsisartuni issiavissannut ingissinnaavutit tikilluarillu.

Eqaluk Høegh, Inuit Ataqtigiit, 2021-mi decembarip ulluisa 31-ata tungaanut napparsimaneq pissutigalugu sulinngiffeqarpoq, taamaalillunilu Mariia Simonsen sinniisussatur ingerlaannassalluni.

Ilisimatitsissutigineqassaaq Inatsisartut sinnerlugit Ataqinartorsuaq Dronning Margrethe Aappaat, qallunaat naalakkersuisui, Folketingi, Islandimi Altingi, Savalimmiuni Lagtingi Nunavummilu inatsisartut inuulluaqqussummik nassikkakkit, Inatsisartut ukiuani nutaami tulluuttumi sulinissaanni pitsaasumik inerititaqarfusumillu suleqatigiinnissaq kissaatigalugu.

Oqaluttarfitta tunuani iigaq timmissanik kusanartorsuarnik tuullinnik marlunnik Jens Rosingimit marrarmik suliaasunik kusassaateqarpoq. Tuullik qassarissuunini pillugu oqallorissuunermut ilisarnaatigitinneqartarpoq. Peqatigitillugu timmiaq taanna tappilluinnartuullunilu eqiingasuugami qoqassiuminaatsuuvoq. Neriuppunga 2021-mi ukiakkut ataatsimiinnermi oqallinnerit eqiingangersilu tamatuminnga sunnersimaneqarumaartut. Minnerunngitsumik neriuutigaara oqaatsitta atornerarnerat illersussagipput oqallinnernilu avataaniit oqaasersiat sapinngisamik atornaveersaarlugit.

Neriuppunga ukiakkut ataatsimiinneq pitsaasoq inerititaqarfusorlu, nunatsinni innuttaasut sulii siuariartornissaannut aalajangiiviusoq, peqatigiilluta qularnaassagipput.

Taamaalillunga Inatsisartut 2021-mi Ukiakkut Ataatsimiinnerat ammarneqartutut nalunaarutigaa.

Oqaluuserisassani immikkoortumut tullermut ingerlaqqinnginnitsinni Landsrådimut, Inatsisartunut, Naalackersuisunut Folketingimullu ilaasortaasimasoq, taamatullu aamma Naalackersuisunut Inatsisartunullu siulittaasuusimasoq Lars-Emil Johansen, ullumikkut 75-inik ukioqalerluni inuussiortoq qamannga pisumik pilluaqqorusuppara. Lars-Emil Johansen inuissiorluarnissaanik kissaapparput.

Taamaalilluta aamma oqaluuserisassani immikkoortumut tullermut ingerlaqqissinnaanngorpugut.

UKA 2021/1

J. nr. 21UKA/01.25.01-1